

T 2511  
8243

CHINESE - JAPANESE LIBRARY OF  
HARVARD - YENCHING INSTITUTE  
AT HARVARD UNIVERSITY  
SEP 1 1938

サ  
五  
三  
八



列傳第六十八

通志一百五十五

北齊

邢邵

魏收

魏長賢

魏蘭根 族子愷

刁柔

王松年

陸乂 叔父香

張晏之

羊烈

鄭述祖 兄子元禮  
族子維

袁聿修

盧叔彪

源彪

許惇





宋世軌

李庶 弟蔚 若

李公緒 弟槃

裴澤

邢邵字子才小字吉河間鄭人也祖敏魏著作郎父蚪  
光祿少卿邵少時有避遂不行名年五歲清河崔亮見  
而竒之曰此子後當大成位望通顯十歲便能屬文雅  
有才思聰明彊記日誦萬餘言族兄巒有人倫鑒識甚  
異之謂子弟曰宗室中有此兒非常人也少在洛陽會  
天下無事與時名勝專以山水游宴為娛不暇勤業嘗  
霖雨乃讀漢書五日略能徧記之後因飲謔倦方廣尋

尋經史五行俱下一覽便無所遺文章典麗既贍且速  
年未二十名動衣冠嘗與右北平陽固河東裴伯茂從  
兄杲河南陸道暉等至北海王昕舍宿飲相與賦詩凡  
數十首皆在主人奴處旦日奴行諸人求詩不得邵皆  
為之誦諸人有不認詩者奴還得本不誤一字諸人方  
之王粲焉年未弱冠聲動京洛吏部尚書隴西李神儁  
大相欽重引為忘年之交釋巾為魏宣武挽郎除奉朝  
請遷著作佐郎深為領軍元義所禮元新除尚書令神  
儁與陳郡袁翻在席元令邵作謝表須臾便就以示諸



賈神雋曰邢邵此表足使袁公變色孝昌初與黃門侍郎李琰之對典朝儀自孝明之後文雅大盛邵雕蟲之美獨步當時每一文初出京師爲之紙貴讀誦俄徧遠近于時陳郡袁翻與范陽祖瑩位望通顯而有才名以邵藻思華贍共嫉之每洛中貴人拜職多憑邵爲謝章表嘗一貴人初授官大事實餽翻與邵俱在坐翻意謂主人託其爲讓表旣而令邵爲之翻甚不悅每告人云邢家小兒嘗客作章表自買黃紙寫而送之邵恐爲翻所害乃辭以疾屬尚書令元羅出鎮青州啓爲府司馬

遂在青土終日酬賞盡山泉之致永安初累遷中書侍郎所作詔誥文體宏麗冠絕當時及爾朱兆入洛京師擾亂邵與弘農楊愔避地嵩高山普泰中兼給事黃門侍郎尋爲散騎常侍太昌初勅令常直內省給御食令覆按尚書門下事凡除大官先問其可否然後施行除衛將軍領國子祭酒以親老還鄉詔所在特給兵力五人并令歲一入朝以備顧問丁母憂哀毀過禮後楊愔與魏元義及邵請置學及脩立明堂靈太后令曰配饗大禮爲國之本比以戎馬在郊未遑脩繕今四表晏寧



當勅有司別議經始累遷尚書令加侍中于時與梁和  
妙簡聘使邵與魏收及從子子明被徵入朝當時文人  
皆在邵之下但以邵不持威儀名高難副朝廷不令出  
境南人曾問賓司邢子才故應是北間第一才士何為  
不作聘使荅曰子才文辭實無所媿但官位已高恐非  
復行限南人曰鄭伯猷護軍猶得將命國子祭酒何為  
不可邵既不行請復還故郡文宣在京輔政徵之在弟  
為賓客除給事黃門侍郎與溫子昇對為侍讀文宣富  
於春秋初總朝政崔暹每勸禮接名賢詢訪得失以邵

宿有名望故請徵焉文宣甚親重之多別引見邵舊鄙  
崔暹無學術言論之際遂云暹無所知解文宣還以邵  
言告暹并道此漢不可親近暹頗銜之邵奏魏帝發勅  
用妻兄李伯倫為司徒祭酒詔書已出崔暹即啓文宣  
執其專擅伯倫官事便寢邵由是被踈其後除驃騎西  
兗州刺史在州有善政桴鼓不鳴吏民奸狀守令長短  
無不知之定陶縣去州五十里縣令妻日暮取人斗酒  
東脯邵逼夜攝令未明而去責其取受舉州不識其所  
以在任都不營生產唯南兗糴粟就濟陽食之邵繕治



觀宇頗為壯麗皆為之名題有清風觀明月樓而不擾  
公私唯使兵力吏民為立生祠并勒碑頌德及替下吏  
民父老爰及媪嫗皆遠相攀追號泣不絕至都除中書  
令舊格制生兩男者當賞羊五口不然則絹十匹僕射  
崔暹奏絕之邵云此格不宜輒斷勾踐以區區之越賞  
法生三男者給乳母況以天下之大而絕此條舜藏金  
於山不以為乏今藏之於民復何所損又准舊皆訊囚  
取占然後送付廷尉邵以為不可乃立議云設官分職  
各有司存丞相不問闕人虞官弓招不進豈使尸祝兼

刀匕之役家長侵雞犬之功詔並從之後除太常卿兼  
中書監攝國子祭酒是時朝臣多守一職帶領二官甚少  
邵頓居三職並是文學之首當世榮之文宣幸晉陽路中  
頗有甘露之瑞朝臣皆作甘露頌尚書符令邵為之序  
及文宣崩凶禮多見訊訪勅撰哀策後授特進卒邵率  
情簡素內行脩謹兄弟親姻之間稱為雍睦博覽墳籍  
無不通曉晚年尤以五經章句為意窮其指要吉凶禮  
儀公私諮稟質疑去惑為世指南每公卿會議事關典  
故邵援筆立成證引該洽帝命朝章取定俄頃詞致宏



遠獨步當時與濟陰溫子昇爲文士之冠世論謂之溫邢  
鉅鹿魏收雖天才豔發而年事在二人之後故子昇死  
後方稱邢魏焉邵雖望實兼重不以才位傲物脫略簡  
芟不脩威儀車服器用充事而已有齋不居坐卧常在  
一小屋果餌之屬或置梁上賓至下而共噉天姿質素  
特安異同士無賢愚皆能顧接對客或解衣覓虱且與  
劇談有書甚多而不甚讎校見人校書笑曰何愚之甚  
天下書至死讀不可徧焉能始復校此且思誤書更是  
一適妻弟李季節才學之士謂邵曰世間人多不聰

明思誤書何由能得邵曰若思不能得便不勞讀書與婦  
甚疎未嘗內宿自云嘗晝入內閣爲狗所吠言畢撫掌大  
笑性好談賞又不能閑獨公事歸休常須賓客自伴事  
寡嫂甚謹養孤子恕慈愛特深在兗州有都信云恕疾  
便爲之廢寢食顏色貶損及卒人士爲之傷心邵痛悼  
雖甚竟不再哭賓客弔慰收淚而已其高情達識開遣  
滯累自東門吳以還所未有也有集三十卷見行於世  
邵世息大寶有文情孽子大德大道略不識字焉  
魏收字伯起小字佛助鉅鹿下曲陽人也父子建魏世



通志北齊列傳六十八  
多歷藩牧位驃騎大將軍自有傳收少機警不持細行  
年十五頗已屬文及隨父赴邊好習騎射欲以武藝自  
進榮陽鄭伯調之曰魏郎弄戟多少收慙遂折節讀書  
夏月坐版牀隨樹陰誦讀積年牀版爲之銳減而精力  
不輟以文華顯初除太學博士及爾朱榮於河陰濫害  
朝士收亦在圍中以日晏獲免吏部尚書李神雋重收  
材學奏授司徒記室參軍永安二年除北主客郎中節  
閔帝立妙簡近侍詔試收爲封禪書收下筆便就不立  
草文將千言所改無幾時黃門郎賈思同侍立深奇

之白帝曰雖七步之才無以過此遷散騎侍郎尋勅典  
起居注并脩國史俄兼中書侍郎時年二十六孝武初  
又詔收攝本職文誥填積事咸稱旨黃門郎崔陵從神  
武入朝熏灼於世收初不詣門陵爲帝登阼赦云朕託  
體孝文收嗤其率直正真郎李慎以告之陵深忿忌節  
閔帝殂令收爲詔陵乃宣言收普泰世出入幃幄一日造  
詔優爲詞旨然則義旗之士盡爲逆人又收父老合解  
官歸侍南臺將加彈劾賴尚書辛雄爲言於中尉綦儁  
乃解收有賤生弟仲同先未齒錄因此怖懼上籍遣還



鄉扶持孝武嘗大發士卒狩於嵩少之南旬有六日時  
大寒朝野嗟怨帝與從官及諸妃主奇妓異飾多非禮  
度收欲言則懼欲默而不能已乃上南狩賦以諷焉收  
賦雖寓言浮麗而終歸雅正帝手詔報焉甚見褒美鄭  
白卿不遇老夫猶應逐兔初神武固讓天柱大將  
軍帝勅收為詔令遂所請欲加相國問收相國品秩收以  
實對帝遂止收既未測主相之意以前事不安求改詔  
許焉久之除廣平王贊開府從事中郎贊帝之兄子也  
時以親貴高選僚屬收不敢致辭乃為庭竹賦以致已

兼中書舍人與濟陰溫子昇河間邢子才齊譽世  
號三才時孝武與神武內有閒隙收遂以父疾固辭而  
免其舅崔孝芬怪而問之收曰懼有晉陽之甲尋而神  
武理兵南上帝西入關天平初與邢邵等同召赴鄴詔  
收以通直散騎常侍副王昕聘梁昕風流文辯收辭藻  
富逸梁主及其羣臣咸加敬異先是南北初和李諧盧  
元明首通使命二人才器並高為鄰國所重至此梁主  
稱曰盧李命世王魏中興未知後來何如耳收在館遂  
買吳婢入館其部下有買婢者收亦喚取徧行奸穢館



司皆爲之獲罪梁人稱其才而鄙其行在途作聘游賦  
辭甚美盛使還尚書右僕射高隆之求南貨於昕昕不  
能如志遂諷御史中尉高仲密禁止昕收於其臺久之  
得釋及孫搢死司馬子如薦收召赴晉陽以爲中外府  
主簿以受旨乖忤頗被嫌責加以箠楚久不得志會司  
馬子如奉使霸朝收假其餘光子如因宴戲言於神武  
曰魏收天子中書郎一國大才願大王借與顏色由此  
轉府屬然未甚優禮收叔季景有才學歷官著名並在  
收前然收常所欺忽季景收初赴并頓丘李庶者故大

司農諧之子也以華辯見稱曾謂收曰霸朝便有二魏  
收率爾曰以從叔見比便是邪輸之比卿邪輸者故尚  
書令陳留公繼伯之子愚癡有名好自入市肆高價買  
物商賈共所嗤詭收忽以季景方之其不遜多如此收  
本以文才必望穎脫見知位既不遂求脩國史崔暹爲  
言於文襄曰國史事重公家父子霸王功業皆須具載  
非收不可文襄乃啓收兼散騎常侍脩國史武定二年  
除正常侍領兼中書侍郎仍脩史魏帝宴百寮問何故  
名人曰皆莫能知收對曰晉議郎董勛答問禮俗云正



月一日為雞二日為狗三日為猪四日為羊五日為牛  
六日為馬七日為人時邢邵亦在側甚惡焉自魏梁通  
和好書下紙每云想彼境內寧靜此率土安和梁後使  
其書乃去彼字自稱猶著此欲示無外之意收定報書  
云想境內清晏令萬國安和梁人復書依以為體後神  
武入朝靜帝授相國固讓令收為啓啓成呈上文襄時  
侍側神武指收曰此人當復為崔光四年神武於西門  
豹祠宴集譚司馬子如曰魏收既為史官書吾等善惡  
聞北伐時諸貴常餉史官飲食司馬僕射頗曾餉否因

共大笑仍謂收曰卿勿見元康等在吾目下趨走謂吾  
以為勤勞我後世身名在卿手勿謂我不知尋加兼著  
作郎收昔在京洛輕薄尤甚人號云魏收驚蛺蝶文襄  
在鄴嘗出游東山攜諸朝彦宴集文襄曰魏收恃才使  
氣卿等須出其短徃復數番收忽大唱曰楊遵彥理屈  
已倒憊從容曰我綽有餘暇山立不動若遇當塗恐翻  
翩逐逝當塗者魏翩翩者蝶也文襄先知之大笑稱善  
文襄又曰向語猶微宜更指斥憊應聲曰魏收在并作  
一篇詩對衆讀訖云打從叔季景出六百斗畚亦不辦



通志七十一  
此遠近所知非敢妄說文襄喜曰我亦先聞衆人皆笑  
收雖自申雪不復抗拒終身病之侯景叛入梁寇南境  
文襄時在晉陽令收爲檄書五十餘帋不日而就又移  
梁朝令送侯景初夜執筆三更便了文過七紙文襄善  
之魏帝曾季秋大射於後園燕射普令賦詩收詩末云  
尺書徵建業折簡召長安文襄甚壯之顧謂諸人曰在  
朝今有魏收便是國之光采雅俗文墨通達縱橫我亦  
使子才子昇時有所作至於辭氣並不及之吾或意有  
所懷忘而不語或語而不盡及魏收呈草皆以周悉此

亦難有又勅兼主客郎接梁使謝琨徐陵侯景陷梁梁鄱  
陽王範時爲合州刺史文襄勅收以書喻之範得書仍  
率部伍西上州刺史崔聖念入據其城文襄謂收曰今  
定一州卿之力也猶恨尺書招建業未効耳文襄崩文  
宣如晉陽令與黃門郎崔季舒高德正吏部郎中尉瑾  
於此第參掌機密十月轉秘書監仍兼著作郎又除大  
中正時齊將受禪密旨召收置之別館令撰禪代詔冊  
諸文遣徐之才守門不聽出天保元年除中書令仍兼  
著作郎封富平縣子二年受詔撰魏史四年除魏尹故



優以祿秩專在史閣不治郡事初帝令羣臣各言志收  
曰臣願得直筆東觀早出魏書故帝使收專其任又詔平  
原王高隆之總監之署名而已帝勅收曰好直筆我終  
不作魏太武誅史官始魏初鄧淵撰代記十餘卷其後  
崔浩典史游允程駿李彪崔光李琰之郎知世脩其業  
浩為編年體彪始分作紀表志傳書猶未出宣武時命  
邢巒追撰孝文起居注正光初又命崔鴻王遵業等補  
續其書下訖孝明事甚委悉濟陰王暉業撰辯宗室錄  
三十卷收於是與通直常侍房延祐司空司馬辛元植

國子博士刁柔裴昂之尚書郎高孝幹等平心斟酌以成  
魏書辯定名稱隨條甄舉又搜採亡遺綴續後事備一  
代史籍表而上聞之勒成一代大典九十一紀九十二  
列傳合一百一十卷五年三月奏上之秋除梁州刺史  
收以史志未成請終業許之十一月復奏十志天象四  
卷地形三卷律歷二卷禮樂四卷食貨一卷刑罰一卷  
靈徵二卷官氏二卷釋老一卷凡二十卷續於紀傳合  
一百三十卷分為十二表其史三十五例二十五序九  
十四論前後二表一啓皆獨出於收收所引史官恐其



陵逼惟取學流先相依附者其房延祐辛元植睦仲讓  
雖夙涉朝位並非史才刁柔裴昂之以儒業見知全不  
堪編緝高孝幹以左道求進修史諸人宗祖姻戚多被  
書錄飾以美言收性頗急不甚能平夙有怨者多沒其  
善每言何物小子敢共魏收作色舉之則使上天按之  
當使入地初收在神武時爲太常少卿修國史時得陽  
休之之助因謝休之曰無以謝德當爲卿作佳傳休之  
父固魏世爲北平太守以貪虐爲中尉李平所彈獲罪  
載在魏起居注收書云固爲北平甚有惠政坐公事免

官又云李平深相敬重爾朱榮於魏爲賊收以高氏出  
於爾朱氏收旣觀望復納爾朱榮子金故爲榮滅其惡  
而增其善論云若脩德義之風則韓彭伊霍夫何足數  
時論旣言收著史不平文宣詔收於尚書省與諸家子  
孫共加討論前後投訴百有餘人或云遺其家世職位  
或云其家不見記錄或云妄有非毀收皆隨狀答之范  
陽盧斐父同附出族祖玄傳下頓立李庶家傳稱其本是  
梁國家人斐庶譏議云史書不直收性急不勝其憤啓  
誣其罪欲加屠害帝大怒親自詰責斐曰臣父仕魏位至



儀同功業顯著名聞天下與收無親遂不立傳博陵崔  
綽位至本郡功曹更無事迹是收外親乃為傳首收曰  
綽雖無位道義可嘉所以合傳帝曰卿何由知其好人  
收曰高允曾為綽讚稱有道德帝曰司空才士為人作  
讚正應稱揚亦如卿為人作文章道其好者豈能皆實  
收無以對戰慄而已但帝先重收才不欲加罪時太原  
王松年亦謗史及斐庶並獲罪各被鞭配甲坊或因以  
致死盧思道亦抵罪然猶以羣口沸騰勅魏史且勿施  
行令羣官博議聽有家事者入署不實者陳牒於是衆

口蹶然號為穢史投牒者相次收無以抗之時左僕射  
楊愔右僕射高德正二人執傾朝野與收皆親收遂為  
其家並作傳二人不欲言史不實抑塞訴辭終文宣世  
更不重論尚書陸操嘗謂楊愔云觀魏收之書可謂博  
物宏才有大功於魏室愔又嘗語收云此可謂不刊之  
書傳之萬古但恨論及諸家枝葉親姻過為繁碎與舊  
史體例不同耳收答云往因中原喪亂人士譜牒遺逸  
略盡是以具書其枝派望公觀過知仁以免尤責收為  
楊愔家傳甚美是以深被黨助故松年等獲罪而愔迎



合收意故有是言八年除太子少傅監脩國史復參議  
律令三臺成文宣曰臺成須有賦惜先以告收收上皇  
居新殿臺賦其文甚壯麗時所作者自邢邵以下咸不  
逮焉收上賦前數日乃告邢邵邵謂人曰收忌人居前  
故不早言之帝曾游東山勅收作詔宣揚威德譬喻關西  
俄頃而訖辭理宏壯帝對百寮大嗟賞之仍兼太子詹  
事收娶其舅女崔氏產一女無子後魏太常劉芳孫女  
中書郎崔肇師女夫家坐事帝並賜收爲妻時人比之  
賈充置左右夫人然終以無子後病甚恐身後嫡媵不

平乃放二姬及疾瘳追憶作懷離賦以申其意文宣每  
以酣宴之次云太子性懦社稷事重終當傳大位於常  
山收謂尚書令楊愔曰古人有言太子國之根本不可  
動搖至尊三爵之後每言傳位於常山令臣下疑貳豈  
社稷之福若實便須決行若戲此言魏收既備太子師  
傳正當守之以死但恐國家不安楊愔以收言奏聞帝  
自此便止帝數宴喜收每預侍從皇太子之納鄭良娣  
也有司備設牢饌帝既酣飲起而自毀覆之仍詔收曰  
知我意不收曰臣愚謂良娣既東宮之妾理不須牢仰



通志卷之六十一  
惟聖懷緣此毀去帝大笑握收手曰卿知我意安德王  
延宗納趙郡李祖收女爲妃後帝幸李宅宴而妃母李  
氏薦二石榴於帝前問諸人莫知其意帝投之收曰石  
榴房中多子王新婚妃母欲子孫衆多帝大喜詔收卿  
還將來仍賜收美錦二疋十年除儀同三司帝在宴席  
口勅以爲中書監命中書郎李愔於樹下造詔愔以收  
一代盛才難於率爾久而未訖比成帝已醉醒遂不重  
言愔仍不奏事竟寢及帝崩於晉陽驛召收及中山太  
守陽休之參議吉凶之禮兼掌詔誥仍除侍中遷入帝

卿文宣謚及廟號陵名皆收議也及孝昭居中宰事命  
收禁中爲諸詔文積日不出轉中書監皇建元年除兼  
侍中右光祿大夫仍儀同監史收先副王昕使梁不相  
協睦時昕弟晞親密而孝昭別令休之兼中書在晉陽  
典詔誥收留在鄴蓋晞所爲收大不平謂太子舍人盧  
詢祖曰若使卿作文誥我亦不言又除祖珽爲著作郎  
欲以代收司空主簿李勣文詞士也聞而告人曰詔誥  
悉歸陽子列著作復遣祖孝徵文史頓失恐魏公發背  
於時詔議二王三恪收執王肅杜預議以元氏司馬氏



爲二王通曹氏備三恪詔諸禮學之官皆執鄭玄五代  
之議孝昭后姓元議恪不欲廣及故議從收又除兼太  
子少傅解侍中帝以魏史未行詔收更加研審收奉詔  
頗有改正及詔行魏史收以爲直置秘閣外人無由得  
見於是命送一本付并省一本付鄴下任人寫之大寧  
元年加開府河清二年兼右僕射時武成酣飲終日朝  
事專委侍中高元海元海凡庸不堪大任以收名振俗  
都官尚書畢義雲長於斷割乃虛心倚杖收畏避不能  
匡救爲議者所譏帝於華林別起玄洲苑備山水臺觀

之麗詔於閣上畫收容像其見重如此始收比溫子昇  
邢邵稍爲後進邵旣被踈出子昇又以罪死收遂被任  
用獨步一時議論更相訾毀各有朋黨收每譏陋邢文  
邵又云江南任昉文體本踈魏收非直模擬亦大偷竊  
收聞之乃言曰伊嘗於沈約集中作賊何意道我偷任  
昉任沈俱有重名於江左邢魏各有所好尚武平中  
黃門郎顏之推以二公之意問左僕射祖珽珽答云見  
邢魏之臧否即是任沈之優劣收以溫子昇全不作賦  
邢雖有一兩首又非所長常云會須能作賦始成大才



士唯以章表碑誌自許此外更同兒戲自武定二年已  
後國家大事詔命軍國文詞皆收所作每有警急受詔  
立成或時中使催促收下筆有同宿構敏速之工邢溫  
所不逮也其參議典禮與邢相埒既而趙郡公增年獲  
免收知而過之事發除名其年又以託附陳使封孝琰  
牒令其門客與行遇崐崙舶至得奇貨果然襍表美玉  
盈尺等數十件罪當流以贖論三年起除清都尹尋遣  
黃門郎元文遙勅收曰卿舊人事我家最久前者之罪  
情在可恕比令卿為尹非謂美授但初起卿斟酌如此

朕豈可用卿之才而忘卿身待至十月當還卿開府天  
統元年除左光祿大夫二年行齊州刺史尋為真收以  
子姪年少著枕中篇以申戒厲文多不錄其後羣臣多  
言魏史不實武成復勅更審收又回換遂為盧同立傳  
崔綽反更附出楊愔家傳本無有魏以來一門而已八字  
至是加之又先云弘農華陰人乃改為自云弘農人以配  
王慧龍自云太原人此其失也尋除開府中書監武成  
崩未發喪在內諸公以後主即位有年疑於赦令諸公  
引收訪焉收固執宜有恩澤乃從之掌詔誥除尚書右



僕射總議監五禮事位特進收奏請趙彥深和士開徐之才共監先以告士開士開驚辭以不學收曰天下事皆由五禮非王不決士開謝而許之多引文士令執筆儒者馬敬德熊安生權會實主之武平三年薨贈司空尚書左僕射謚曰文貞有集七十卷收碩學文才然性褊不能達命體道見當塗貴游每以言色相悅然提獎後輩以名行為先浮華輕險之徒雖有才能弗重也初河間邢子才子明及季景與收並以文章顯世稱大邢小魏言尤俊也收少子才十歲子才每曰佛助察人之

偉後收稍與子才爭名文宣貶子才曰爾才不及魏收收益得志自序云先稱溫邢後曰邢魏然收內陋邢心不許也收既輕疾好聲樂善胡舞文宣末數於東山與諸優爲獼猴與狗鬪帝寵狎之收外兄博陵崔巖嘗以變聲嘲收曰遇魏收衰曰愚魏魏答曰顏巖腥瘦是誰所生羊頤狗頰頭閹鼻平飯房吟籠著孔嘲打其辯捷不拘若是旣緣史筆多憾於人齊亡之歲收冢被發棄其骨于外先養弟子仁表爲嗣位至尚書膳部郎中隋開皇中卒於溫縣令



魏長賢收之族叔也祖釗魏義陽太守父彥光州長史  
釗自有傳彥嘗欲刪改衆家晉書爲一家之典不就而  
彥長賢博涉經史詞藻精華舉秀才除汝南王悅參軍  
事入齊平陽王淹辟爲法曹參軍轉著作佐郎更撰晉  
書欲還成先志河清中上書譏刺時政大忤權幸爲上  
黨屯留令親故以長賢不相時而動或爲書以相規責  
長賢復書曰日者惠書義高旨遠誨僕以自求諸已思  
不出位國之大事君與執政所圖又謂僕祿不足以代  
耕位不登於執戟干非其議自貽悔咎勤勤懇懇誠見

故入之心靜言再思無忘無寐僕雖固陋亦嘗奉教於  
君子矣以爲士之立身其略不一故有負鼎俎以趨世  
隱漁釣以待時操築傳巖之下取履屺橋之上者矣或  
有釋賃車以匡霸業委挽輅以定王基由斬祛以見禮  
因射鉤而受相矣或有三黜不移屈身以直道九死不  
悔甘心於苦節者矣皆奮於泥滓自致於青雲雖事有  
萬殊而理終一致權其大要歸乎忠孝而已矣夫孝則  
竭力所生忠則致身所事未有孝而遺其親忠而後其  
君者也僕自射策金馬記言麟閣寒暑迭運五稔于茲



不能勒成一家潤色鴻業善述人事功既闕如顯親揚  
名邈焉無冀每一念之曷云其已自頃王室板蕩彝倫  
攸斃大臣恃保而莫諫小臣畏罪而不言虛痛朝危空  
哀主辱匪躬之故徒聞其語有犯無隱未見其人此梅  
福所以獻書朱雲所以請劔者也抑又聞之發不恤緯  
而憂宗周之亡女不懷歸而悲太子之少況僕之先人  
世傳儒業訓僕以爲子之道厲僕以事君之節今僕之  
委質有年世矣安可自同於匹庶取笑於兒女子哉是  
以腸一夕而九回心終朝而百慮懼當年之不立耻沒

世而無聞慷慨懷古自彊不息庶幾伯夷之風以立懦  
夫之志吾子以謂僕干進務入不畏友朋吾下訕上欲  
益反損僕誠不敏以貽吾子之羞默然苟容又非平生  
之意故願得鋤彼草茅逐茲鳥雀去一惡樹一善不違  
先旨不沒九泉求仁得仁其誰敢怨但言與不言在我  
用與不用在時若國道方屯時不我與以忠獲罪以信  
見疑貝錦成章青蠅變色良田敗於邪徑黃金鑠於衆  
口窮達運也其如命何吾子忠告之言敢不敬承嘉惠  
然則僕之所懷未可一二爲俗人道也投筆而已夫復



何言是出也人皆爲之怏怏而長賢處之怡然不屑懷  
抱識者以此多焉武平中辭疾去職終於齊代不復出  
仕周武平齊搜揚才俊辟書屢降固以疾辭卒年七十  
四貞觀中贈定州刺史子徵知名

魏蘭根字蘭根收之族叔也父伯成魏中山太守蘭根  
身長八尺儀貌奇偉汎覽羣書誦左氏傳周易機警有  
識悟起家北海王國侍郎母憂居喪有孝稱將葬常山  
郡境先有董卓祠祠有栢樹蘭根以卓凶逆不應遺祠  
至今乃啓刺史請伐爲椁左右人言有靈蘭根了無疑

懼父喪廬於墓側負土成墳憂毀殆於滅性正光末尚  
書令李崇爲大都督討蠕蠕以蘭根爲長史因說崇曰  
緣邊諸鎮控攝長遠昔時初置地廣人稀或徵發中原  
疆宗子弟或國之肺腑寄以爪牙中年以來有司乖實  
號曰府戶役同厮養官婚班齒致失清流而本宗舊類  
各各榮顯顧瞻彼此理當憤怨更張琴瑟今也其時靜  
境寧邊事之大者宜改鎮立州分置郡縣凡是府戶悉  
免爲平民入仕次第一准其舊文武兼用威恩並施此  
計若行國家庶無北顧之慮崇以奏聞事寢不報孝昌



初為岐州刺史從行臺蕭寶夤討破宛川俘其民為奴  
婢以美女十人賞蘭根蘭根辭曰此縣介於疆虜皇威  
未接故成背叛今當恤其飢寒柰何將充僕隸乎於是  
盡以歸其父兄部內麥多五穗隣州田鼠為灾犬牙不  
入岐境屬蕭寶夤敗於涇州岐州人囚蘭根降賊及寶  
夤兵威復振城人復斬賊刺史侯莫陳仲和推蘭根復  
任朝廷以蘭根得西土人心加都督涇岐東秦南岐四  
州諸軍事兼四州行臺尚書孝昌末河北流人南度以  
蘭根兼尚書使齊濟二兗四州安撫并置郡縣蘭根錫

邢杲反於青光間復詔蘭根慰勞杲不下仍隨元天穆  
討之還拜中書令孝莊帝將誅爾朱榮蘭根泄之於兄  
子周達周達告爾朱世隆及榮死蘭根憂不知所出時  
應詔王道習見信於孝莊蘭根乃託附之求出立功乃  
以為兼尚書右僕射河北行臺於定州率募鄉曲欲防  
井陘為爾朱榮將侯深所敗走依渤海高乾屬乾兄弟  
舉義因在其中神武至以蘭根宿望深禮遇之中興初  
除尚書右僕射神武將入洛陽遣蘭根先至京師時廢  
立未決令蘭根觀察節閔帝帝神武高明蘭根恐於後



難測遂與高乾兄弟及黃門崔陵同心固請於神武神  
武不得已遂立孝武帝大昌初加侍中開府儀同三司封  
鉅鹿侯啓授兄子周達蘭根既預勲業位居端副始叙  
復岐州勲封永興侯高乾之死蘭根憂怖乃移病解僕  
射後以疾篤上表求還鄉里魏帝遣使勞問猶以開府  
儀同三司歸本鄉門施行馬武定三年薨贈司徒公謚  
曰文宣長子相如襲爵相如性亢直有文藻與族兄愷  
齊名雅為當時所重早卒孝昭時佐命功臣配饗不及  
蘭根次子敬仲表訴竟下允敬仲以才器稱卒於章武

太守子餉字孝衡幼孤學涉有時譽居喪以孝聞隋  
州司倉參軍事子景義景禮並有才行鄉人呼為雙鳳  
早卒敬仲弟少政位至洛州刺史子孝該孝幾愷自散  
騎常侍遷青州長史固辭文宣大怒曰何物漢子與官  
不就時帝已失德朝廷為之懼愷容色怛然帝曰死與  
長史任卿所擇答曰能殺臣者陛下不受長史者愚臣  
帝謂楊愔曰何慮無人苦用此漢放還求不須收由是  
積年沈廢後遇愔於路微自陳愔云咸由中旨愷應聲  
曰雖復零雨自天終待雲興四岳公豈得言不知楊愔



欣然曰此言極為簡要數日除霍州刺史在職有政理  
後卒於膠州刺史

刁柔字子溫勃海饒安人也父整魏贈司空柔少好學  
留心儀禮性彊記至於氏族內外皆所諳悉居母喪以  
孝聞初為魏宣武挽歌郎解巾司空行參軍天保初累  
遷國子博士中書令魏收撰魏史啓柔等同其事柔性  
專固自是所聞收常嫌憚又參議律令時議者以為五  
等爵邑承襲無嫡子立嫡孫無嫡孫立嫡子弟無嫡子  
弟立嫡孫弟柔以為無嫡孫應立嫡曾孫不應立嫡子

弟議曰案禮立嫡以長故謂長子為嫡子嫡子死以嫡  
子之子為嫡孫死則曾玄亦然然則嫡子之名本為傳  
重故喪服曰庶子不為長子三年不繼祖與禰也禮公  
儀仲子之喪檀弓曰我之前聞也仲子舍其孫而立其  
子何也子服伯子曰仲子亦猶行古之道也昔者文王  
舍伯邑考而立武王微子舍其孫肅而立其弟衍鄭注  
曰仲子為親者諱耳立子非也文王之立武王權也微  
子嫡子死立弟衍殷禮也子游問諸孔子孔子曰否立  
孫注殷以嫡子死立嫡子之母弟周以嫡子死立嫡子



之子爲嫡孫故春秋公羊之義嫡子有孫而死質家親親先立弟文家尊尊先立孫喪服云爲父後者爲出母無服小記云祖父卒而後爲祖母後者三年爲母無服喪者不祭故也爲祖母三年者大宗傳重故也今議以嫡孫死而立嫡子母弟嫡子母弟者則爲父後矣嫡子母弟本非承嫡以無嫡故得爲父後則嫡孫之弟理亦應得爲父後則是父卒然後爲祖後者服斬旣得爲祖服斬而不得傳重未之間也若用殷家親親之義本不應舍嫡子而立嫡孫若從周家尊尊之文豈宜舍其孫

而立其弟或文或質愚用惑焉小記云嫡婦爲舅姑後者則舅姑爲之小功注云謂夫有廢疾他故若死無子不受重者小功庶婦之服凡父母於子舅姑於婦將不傳重於嫡及將所傳重者非嫡服之皆如衆子庶婦也言死無子者謂絕世無子非謂無嫡子如其有子焉得爲無後夫雖廢疾無子婦猶以嫡爲名嫡名旣在而欲廢其子者於禮何有損益革代相泐如謂宗嫡可得而變者則爲後服斬亦宜有因而改七年卒柔在史館未久勒成之際志在偏黨魏書中與其內外通親者並虛



美過實為時論所譏

王松年太原晉陽人魏寧南將軍慧龍之玄孫也父遵業司徒左長史黃門郎松年少知名文襄臨并州辟為主簿累遷通直散騎常侍副李緯使梁使還歷位尚書郎中魏收撰魏書成松年有謗言文宣怒禁止之仍加杖罰歲餘得免除臨漳令遷司馬別駕本州大中正孝昭擢拜給事黃門侍郎帝每賜坐與論政事甚喜之孝昭崩松年馳驛至鄴都宣遺詔發言涕泗迄於宣罷容色無改辭吐諧韻宣訖號慟自絕於地百官莫不感慟

還晉陽兼侍中護梓宮還鄴諸舊臣避形迹無敢盡哀唯松年哭必流涕朝士咸恐武成雖忿松年然以戀舊情切亦雅重之以本官加散騎常侍食高邑縣幹參定律令前後大獄多委焉兼御史中丞發晉陽之鄴在道遇疾卒贈吏部尚書并州刺史謚曰平第二子劭最知名隋史有傳

陸乂字旦代人也祖子彰魏中書監教訓六子雅有法度皆知名當世乂父印天保初授給事黃門侍郎遷吏部郎中有至性列在孝友傳中乂聰敏博學有文才年



十九舉司州秀才歷祕書郎南陽王文學通直散騎侍郎待詔文林館兼散騎侍郎迎陳使還兼中書舍人加通直散騎常侍又於五經最精熟館中謂之石經人爲之語曰五經無對有陸又叔父駿字雲驤自中書舍人歷黃門侍郎散騎常侍卒於東廣州刺史駿弟杳字雲邁亦歷中書舍人黃門常侍假儀同三司秦州刺史武平中爲寇所圍經百餘日就加開府儀同三司城中多疫癘死者過半人無異心遇疾卒及城陷陳將吳明徹以杳有善政吏民所懷啓陳主還其屍家累貲物無

所犯贈開府儀同三司尚書僕射子玄卿位尚書膳部郎杳弟騫字雲儀亦歷中書舍人黃門常侍武平末吏部郎中騫弟搏字雲征好學有行檢卒於著作佐郎搏弟彦師字雲房列在隋史

張晏之字熙德清河東武城人也祖彛魏征西將軍冀州大中正父始均行臺郎中父子俱爲羽林所害事在彛傳晏之幼孤有至性爲母鄭氏教誨動依禮典從爾朱榮平元顥賜爵武城子累遷尚書二千石郎中高岳征潁川復以爲都督中兵參軍兼記室晏之文士兼有



武幹每與岳帷帳之謀又嘗以短兵接刃親獲首級深  
為岳所嗟賞天保初文宣為高陽王納晏之女為妃令  
赴晉陽成禮晏之後園陪讌坐客皆賦詩晏之詩云天  
下有道主明臣直雖休勿休永貽世則文宣嘆曰得卿  
箴諷深以慰懷後行北徐州事尋即真為吏民所愛御  
史崔子武督察州郡至北徐無所案劾唯得百姓所制  
清德頌數篇乃歎曰本求罪狀遂聞頌聲遷兗州刺史  
太常卿子乾威列在隋史

羊烈字信卿太山鉅平人晉太僕卿瑋之七世孫伯父

祉魏贈安東將軍兗州刺史父瑩字靈珍魏兗州別駕  
烈少通敏頗自脩立有成人之風好讀書能言名理以  
玄學知名魏孝昌末烈從兄侃為太山太守據郡起兵  
外叛烈潛知其謀深懼家禍與從兄廣平太守敦馳赴  
洛陽告難朝廷將加厚賞烈告人云譬如斬首全軀所  
存者大故爾豈有幸從兄之敗以為已利乎卒無所受  
天保中累遷尚書祠部左右戶郎中在官咸為稱職除  
陽平太守治有能名是時頻有灾蝗犬牙不入陽平境  
勅書褒美焉武平初為義州刺史尋以老病還鄉卒于



家烈家傳素業閨門脩飾爲世所稱一門女不再醮魏  
太和中於兗州造一尼寺女寡居無子者並出家爲尼  
咸存誠行烈天統中嘗與尚書畢義雲爭兗州大中正  
義雲盛稱門閥云我累世本州刺史卿世爲我家故吏  
烈云卿自畢軌被誅以還寂無人物近日刺史皆疆場  
之上彼此而得何足爲言豈若我之漢河南尹晉朝太  
傅名德學行百世傳美且男清女貞足以相冠自外多  
可稱也蓋譏義雲之帷薄焉烈弟脩有才幹卒於尚書  
左丞子玄正武平末將作丞隋開皇中戶部侍郎卒於

隴西郡贊務

鄭述祖字恭文滎陽開封人祖義父道昭俱爲魏祕書  
監義自有傳述祖少而聰敏有風檢好屬文爲先達所  
稱釋褐司空行參軍歷司徒左長史尚書侍中太常卿  
丞相右長史天保初累遷太子少保左光祿大夫儀同三  
司兗州刺史時穆子容爲巡省使歎曰古人有言聞伯  
夷之風貪夫廉懦夫有立志今於鄭兗州見之矣遷光  
州刺史初述祖父爲兗州於城南小山起齋亭刻石爲  
記述祖時年九歲及爲刺史往尋舊跡得一破石有銘



云中岳先生鄭道昭之白雲堂述祖對之嗚咽悲動羣  
僚有人入市盜布其父怒曰何忍欺吾君執之以歸首  
述祖特原之自是境內無盜人歌之曰大鄭公小鄭公  
相去五十載風教猶相同述祖能鼓琴自造龍吟十弄  
云嘗夢異人彈琴寤而寫得當時以爲絕妙所在好爲山  
池松竹交植盛饌饌以待賓客將迎不倦未貴時在鄉  
單馬出行忽有騎者數百見述祖皆下馬曰公在此行  
列而拜述祖顧問從人皆不見心甚異之未幾被徵終  
歷顯位及疾篤乃自言之且曰吾今老矣一生富貴足

矣以清白之名遺子孫死無所恨前後行瀛殷冀滄趙  
定六州事正除懷兗光三州刺史又重行殷懷趙三州  
刺史所在有惠政天統元年卒於州年八十一贈開府  
儀同三司中書監北豫州刺史謚平簡公述祖文爲趙  
郡王叡妃述祖常坐受王拜命坐王乃坐妃薨後王更  
娶鄭道蔭女王坐受道蔭拜王命坐乃敢坐王謂道蔭  
曰鄭尚書風德如此又貴重宿舊君不得並之述祖子  
元德多藝術官至琅邪太守述祖兄敬祖起家著作郎  
宗人鄭儼之敗也爲鄉人所害敬祖子元禮字文規少



好學愛文藻有名望文襄引為館客歷兼中書舍人南  
太尉諮議參軍長廣樂陵二郡太守待詔文  
林館太子中舍人崔昂後妻元禮姊也魏收又昂之妹  
夫昂常持元禮數篇詩示盧思道乃曰看元禮比來詩  
詠亦當不減魏收思道答云未覺元禮賢於魏收且知  
妹夫踈於婦弟元禮齊亡入周大象中卒於始州別駕  
述祖弟遵祖祕書郎贈光州刺史遵祖弟順祖卒於太  
常丞述祖族子雛有識尚操行清整仕至膠州刺史初  
文宣為皇太子納其女為良娣雛時為尚書郎趙郡李

祖昇兄弟微相敬憚揚悖奏授雛趙郡太守祖昇兄弟  
具服至雛門投刺拜謁文宣聞之喜笑曰足得殺李家  
兒矣

袁聿脩字叔德陳郡陽夏人也父翻魏度支尚書撫軍  
將軍叔父躍車騎將軍太傅清河王懌文學聿脩出繼  
躍後七歲遭喪居處禮若成人九歲州辟主簿性深沈  
有識鑒清淨寡欲與物無競姨丈人尚書崔休深所知  
賞釋褐太保開府祭酒年十八領本州中正兼尚書度  
支郎中天保初除太子庶子以本官行博陵太守大有



聲績遠近稱之累遷司徒左長史領兼御史中丞司徒  
錄事參軍盧思道私貸庫錢三十萬聘太原王义女爲  
妻而王氏以先納陸孔文禮聘爲定聿脩爲首僚又國  
之司憲知而不効免中丞尋遷祕書監天統中詔與趙  
郡王叡等議定五禮出爲信州刺史即其本鄉也時久  
無例莫不榮之爲政清靖不言而化自長史以下爰逮  
鰥寡孤幼皆得其歡心武平初御史普出過諸州梁鄭  
充豫疆境連接州之四面悉有舉劾惟不到信州其見  
知如此及解代還京民庶道俗追列滿道或將酒脯涕

泣留連競欲遠送時旣盛暑恐其勞勩往往爲之駐馬  
隨舉一酌示領其意辭謝今遷後州民鄭播宗等七百  
餘人請爲立碑斂練布數百疋託中書侍郎李德林爲  
文以紀功德府省爲奏勅報許之尋除都官尚書儀同  
三司聿脩少年平和溫潤素流之中最有規檢以名家  
子歷任清華時望多相器待許其風鑒在郎署之日時  
趙彥深爲水部郎中同在一院因成交友彥深後重被  
沙汰停私門生藜藿聿脩猶以故情音問來徃彥深任  
用銘戢甚深雖人才無愧蓋亦由彥深接引爲吏部尚



書以後自以物望得之初馮子琮以僕射攝選婚姻相  
尋聿脩常非笑之語人云馮公營婚日不暇給及自居  
選曹亦不能免時論以爲地勢然也素品孤官頗有怨  
響然在官廉慎當時少匹魏齊世臺郎多不免交通餉  
饋聿脩爲尚書郎十年未曾受斗酒之饋尚書邢邵與  
聿脩舊款每於省中語戲常呼聿脩爲清郎太寧初聿  
脩以太常少卿出使巡省仍今考校官人得失經兗州  
時邢邵爲刺史別後遣送白紬爲信聿脩不受與邵書  
云今日仰遇有異嘗行瓜田李下古人所慎多言譬之

防川願得此心不貽厚責邵亦忻然領解報書云一日  
之贈率爾不思老夫忽忽竟不及此謹承來旨吾無間  
然弟昔爲清郎今日復作清卿矣及在吏部屬政衰道  
喪恐違忤要勢禍不旋踵雖以清白自守猶不免請謁  
之累齊亡入周授儀同大將軍吏部下大夫東京司宗  
中大夫隋開皇初加上儀同遷東京都官尚書東京廢  
入朝除都官尚書二年出爲熊州刺史卒子知禮大業  
初卒於太子內舍人

盧叔彪范陽涿人也父光宗魏尚書儀曹郎中有志尚



兄觀及仲宣並以文章顯於世列在文苑傳叔彪少機  
悟豪率輕俠好奇策慕諸葛亮之爲人爲賀拔勝荊州  
開府長史勝不用其計棄城奔梁叔彪歸本縣築室臨  
陂優游自適文襄降辟書辭疾不到天保初復徵不得  
已衣布裙乘露車至鄴揚愔往候之以爲司徒諮議稱  
疾不受孝昭即位召爲中庶子問以世事叔彪勸討關  
西畫地陳兵勢請立重鎮於平陽與彼蒲州相對深溝  
高壘運糧積甲築城戍以相屬彼若閉關不出則取其  
黃河以東長安窮蹙自然困死如彼出兵非十萬以上

不爲我敵所供糧食皆出關內我兵士相代年別一畝  
穀食豐饒運送不絕彼來求我我不應之彼退即乘其  
弊自長安以西民䟽城遠敵兵來往實難與我相持農  
作且廢不過二年彼自破矣帝深納之又願自居平陽  
成此謀畧帝命元文遥與叔彪參謀撰平西策一卷未  
幾帝崩事遂寢武成踐阼遷太子詹事叔彪在鄉時有  
粟千石每至春夏鄉人無食者令自載取至秋任還其償  
都不計校然而歲常得倍餘旣在朝通貴自以年老兒  
子又多遂營一大屋曰歌於斯哭於斯魏收曾來詣之



訪以京洛舊事不待食而起云難為子費叔彪留之良久食至但有粟殮葵菜木碗盛之片脯而已所將僕從亦盡設食一與此同齊滅歸范陽遭亂城陷與族弟士邃皆以寒餒斃周將宇文神舉以二人有名德收而葬之

源彪字文宗西平樂都人也祖懷魏贈司徒公父子恭贈司空公並有傳彪學涉機警少有名譽魏永安中以功賜爵臨潁縣伯天平四年為涼州大中正及文襄攝選沙汰諸臺郎以彪為尚書祠部郎中皇建二年累遷

涇州刺史彪至以恩信待物甚得邊境之和為鄰人所敬服前政遭抄掠者多被放遣累遷秦州刺史乘傳之府特給後部鼓吹時李貞聘陳陳主云齊朝還遣源涇州來在瓜步真可謂通和矣武平三年授祕書監陳將吳明徹寇淮南歷陽瓜步相尋失守趙彥深於起居省密訪彪以討捍之計彪答曰國家待遇淮南失之同於蒿箭以為宜以淮南委之王琳琳於曇瑱不肯北面事之明矣彥深曰此誠良圖但以口舌爭來十日已是不見從時事如此安可盡言因相顧流涕及齊平與陽休



之等十八人入長安授儀同大將軍司成下大夫隋開  
皇中拜莒州刺史遇病去官卒彪以貴族子弟入升朝  
列才識敏贍以幹局見知然好游貴要之間時論以爲  
善附會

許惇字季良高陽新城人也父護仕魏州主簿兄恂司  
徒諮議參軍惇清識敏速達於從政位司徒主簿以明  
斷見知時人號爲入鐵主簿稍遷陽平太守時魏遷都  
於鄴陽平爲畿郡軍國責辦賦斂無準又勲貴屬請朝  
夕徵求惇並御之以道咸以無怨政爲天下第一特加

賞異圖形於闕詔頒天下歷魏尹齊梁二州刺史政竝  
有治聲遷大司農會王思政入據潁城王師出討惇常  
督運無乏絕引洧水灌城惇之策也天保初遷殿中尚  
書惇美鬚髯下垂至帶省中號長鬣鼠公文宣嘗因酒酣  
握惇鬚頰稱美遂以刀截之唯留一握惇懼因不復敢長  
人又號齊鬚公歷御史中丞膠州刺史司農大理二卿  
再爲度支尚書太子少保少師光祿大夫開府儀同三  
司尚書右僕射特進賜爵萬年縣子食邑下邳郡幹惇  
年老致仕於家三年卒惇少純直晚更浮動齊朝體式



本州大中正以京官為之乾明中邢邵為中書監德望甚高博與邵競中正遂憑附宋欽道出邵為刺史朝議甚鄙薄之雖久處朝行歷官清顯與邢邵魏收陽休之崔劼徐之才比肩同列諸人或談說經史或吟詠詩賦更相嘲戲欣笑滿堂博不好劇談又無學術或坐杜口或隱几而睡不為勝流所重子文紀武平末度支郎中文紀弟文經勤學方雅身無擇行口無戲言武平末殿中侍御史隋開皇初侍御史兼通直散騎常侍聘陳使副主爵侍郎卒於相州長史博兄遜字仲讓有幹局乾

明中平原太守卒贈信州刺史遜子文高司徒揚

宋世軌西河介休人也世為著姓父毓魏太中大夫世軌幼自脩整好法律天保初歷三尚書三公二千石都

官郎中兼并州長史軌獄寬平多所全濟為都官郎中

有囚事枉將送垂致法世軌遣騎追止之切奏其狀遂

免稍遷廷尉少卿洛州人聚結欲劫河橋吏捕案之連

諸元徒黨千七百人崔昂為廷尉以為反數年不斷及

世軌為少卿判其事為劫唯殺魁首餘從坐悉舍焉大

理正蘇珍之以平幹知名寺中語曰決定嫌疑蘇珍之



視表見裏宋世軌時人以為寺中二絕南臺囚到廷尉  
世軌多雪之仍移攝御史將問其濫狀中尉畢義雲不  
送移往復不止世軌遂上書極言義雲酷擅文宣引見  
二人親勅世軌曰我知臺欺寺久卿能執理抗衡但守  
此心勿慮不富貴勅義雲曰卿比所為誠合死以志在  
疾惡故且一恕仍顧謂朝臣曰此二人並我骨鯁臣也  
及卒廷尉御史諸繫囚皆哭曰宋廷尉死我等豈有生  
路贈光州刺史謚曰平無子兄世良以第五子朝基嗣  
李庶頓丘人也祖平魏尚書右僕射父諧大司農各有

傳庶方雅好學甚有家風歷位尚書郎司徒掾以清辯  
知名常攝賓司接對梁客梁客徐陵深歎美焉庶生而  
天閹崔謚調之曰教弟種鬚以錐徧刺作引挿以馬尾  
庶曰先以此方回施貴族藝眉有効然後樹鬚世傳謚  
門有惡疾以呼沲為墓田故庶言及之邢子才在傍大  
笑除臨漳令魏書之出庶與盧斐王松年等訟其不平  
魏收書王慧龍自云太原人又書王瓊不善事以盧同  
附盧玄傳李平為陳留人云其家貧賤故斐等謹訟語  
楊愔云魏收合誅愔黨助魏故遂白文宣庶等竝髡頭



鞭杖二百庶死於臨漳獄中庶兄岳痛之終身不歷臨漳縣門庶妻元羅女也庶亡後岳使妻伴之寢宿積五年元氏更適趙起嘗夢庶謂已曰我薄福託劉氏爲女明日當出彼家甚貧恐不能見養夫妻舊恩故來相見告君乞取我劉家在七帝坊十字街南東入窮巷是也元氏不應庶曰君似懼趙公意我自說之於是起亦夢焉起寤問妻言之符合遂持錢帛躬往求劉氏如所夢得之養女長而嫁焉庶弟蔚少清秀有襟期倫理涉觀史傳兼屬文詞昆季竝尚風流長裾廣袖從容甚美然

頗涉踈放唯蔚能自持公幹理甚有時譽坐兄庶事徙平州後還位尚書左中兵郎中仍聘陳使副江南以其父曾經將命甚重焉還坐將人度江私市除名後卒於祕書丞士友悼惜之蔚弟若聰敏頗傳家業風采詞令有聲鄴下坐兄庶事徙臨海乾明初追還後兼散騎常侍大被親狎加儀同三司若性滑稽善諷誦數奉旨詠詩并使說外間世事可笑樂者凡所話談每多會旨嘗在省中趨而前却對答學奏事之象和士開聞而奏之帝每狎弄之武成以斛律金舊老每朝賜羊車上殿金



曾使人奉啓若爲舍人誤奏云在闕下詔命出羊車若  
重思知金不至竊言羊車鹿車何所迎帝聞亦笑而不  
責又帝於後園講武令若爲吳將皇后皆出引若當前  
觀其進止俯仰事罷遣使謝之厚加賞賜韓長鸞等忌  
惡之密構其短坐免官未幾詔復本官隋開皇中卒於  
秦王府諮議

李公緒字穆叔趙郡平棘人也父籍之魏司徒諮議參  
軍大中大夫公緒性聰敏博通經傳魏末爲冀州司馬  
屬疾去官絕迹贊皇山天保初以侍御史徵不就公緒

沈冥樂道又不閑時務故誓心不仕尤明天文善圖緯  
之學嘗謂子弟曰吾觀齊之分野福德不多國家祚終  
四七及齊亡歲距天保之元二十八年矣公緒雅好著書  
撰典言十卷禮質疑五卷喪服章句一卷古今略記二十  
卷玄子五卷趙記八卷趙語十二卷並行於世公緒既善  
陰陽之術有祕記傳之子孫而不好焉臨終取以投火子  
少通有學行公緒弟槩字季節少好學然性倨傲每對  
諸兄弟露髮披服略無少長之禮爲文襄大將軍府行  
參軍進側集題云富春公主撰閑緩不任事每被譏訶



除殿中侍御史修國史後爲太子舍人爲副使聘于江南江南多以僧寺傳客出入常袒露還坐事解後卒於并州功曹參軍撰戰國春秋及音譜並行於世又自簡詩賦二十四首謂之達生丈人集其序曰達生丈人者生於戰國之世爵里姓名無聞焉爾時人揆其行已彊爲之號頗好屬文成輒棄藁常持論文云古人有言性情生於慾又曰人之性靜慾實汨之然則性也者所受於天神識是也故爲形骸之主情也者所受於性嗜慾是也故爲形骸之役由此言之性情之辯斷焉殊異故

其身泰則均齊死生塵垢名利縱酒恣色所以養情否則屏除愛著擯落枝體收視反聽所以養識是以遇榮樂而無染遭厄窮而不悶或出人間或栖物表逍遙寄託莫知所終

裴澤河東聞喜人祖夙魏河東太守父鑒廷尉卿澤頗有文學孝昭初爲齋帥奏舍人孝昭崩魏收議謚爲恭烈皇帝澤正色抗論曰魏收死後亦不肯爲恭烈之謚何容以擬大行且比皇太后不豫先帝殮寢失常聖躬貶損今者易名必須加孝遂改爲孝昭因此忤旨出爲



廣州司馬尋歷位中書侍郎兼給事黃門侍郎以漏泄  
免後為散騎侍郎尋為誹謗大臣趙彥深等兼詠石榴  
詩微以託意有人以奏武成武成決杖六十髡頭除名  
後主即位為清河郡守與祖珽有舊珽奏除尚書左丞  
又引為兼黃門執政疾其祖珽之黨與崔季舒等同見  
誅澤本勁直無所回避及被出追還折節和光然好戲  
笑無規檢故頻敗妻距鹿魏氏恩好甚隆不能暫相離  
澤每從駕其妻不宿亦至性彊立時人以為健婦夫半

列傳第六十八

通志一百五十五



